

समां - 12:25 hrs.

<><><><><><>

LG Air Force Day

उपराज्यपाल मनोज सिन्हा होरें अज्ज भारतीय व्हाई फौज दे सब्भनैं कर्मियें ते उन्दे परोआर आहलें गी “वायु सेना दिवस” दे मौके पर ममारकबाद ते शुभकामनां दितियां न। उनें वायु सेना दी हिम्मत, दलेरी, समर्थ ते पेशेवराना सलाहियत दी सराहना कीती। एल.जी होरें राष्ट्र दियें व्हाई सीमाएं दी रक्षा करने ते मनुक्खी मिशनें दौरान व्हाई फौज दी भूमिका दी सिफ्त कीती ते आखेया जे समूलचा मुल्ख अपने व्हाई योद्धाएं दी निस्वार्थ सेना ते समर्पण भाव दी सराहना करदे होई उनेंगी सलूट करा करदा ऐ। एह सनेहा देसैं दी रक्षा लेई भारतीय फौज दी निष्ठा ते समर्पण भाव प्रति सब्भनैं दे आभार ते सम्मान प्रगट करदा ऐ।

<><><><><><>

Dy. CM -Drugs Menace

उपमुखमंत्रि सुरिन्दर चौधरी होरें समाज चा नशाखोरी गी भलेया खत्म करने ते सब्भनैं लेई शिक्षा दा सुरक्षत माहौल उपलब्ध करोआना यकीनी बनाने लेई किट्ठे रलियै जतन करने दी जरुरतै पर जोर दिता। कल श्रीनगर आहले सिविल सचिवालय च उनेंगी मिलने आए दे इक शिष्टमंडल गी सम्बोधित करदे होई उपमुखमंत्रि होरें आखेया जे नशाखोरी नै स्हाड़े समाज दे तानेबाने गी पूरी चाल्ली प्रभावत कीता ऐ, जिसी परतियै ठीक करने दी बड़ी मती लोड़ ऐ।

मलाटी दौरान शिष्टमंडलै इक ज्ञापन उनेंगी सौंपेया जेहदे च नशाखोरी आहली कबैतू गी खत्म करने लेई सख्त ते असरदार जतन करने दी जरूरतै लेई गुजारश कीती गेदी ऐ।

<><><><><><>

Itoo Health

सेहत ते मैडिकल शिक्षा मंत्री स्कीना इतू होरें आखेया ऐ जे सरकार सब्भनैं मैडिकल कालजें दे बवस्था आहले ते कुशल ढंगै नै कम्म करना यकीनी बनाने लेई दृढ़ संकल्प ऐ इस करियें विद्यार्थियें ते मरीजें लेई भलेया अज्जै-कल्लै दे ढंगै दियां सुविधां उपलब्ध कराइयां जा करदियां न। मंत्री होरें एह गल्ल इक उच्ची सतह दी बैठका च आखी जेहड़ी बक्ख-बक्ख जिलें दे सरकारी मैडिकल कालजें दी कारकर्दगी ढांचागत सुविधाएं ते उपलब्ध सेवाएं, प्रगति ते उपलब्धियें दी समीक्षा करने लेई लोआई गेदी ही। इस दौरान मंत्री होरें जारी परियोजनाएं गी समे-सिर तोड़ चाढ़ने, कम्मैं कारवाइयें च पारदर्शिता बनाई रखने ते मरीजें दी मयारी दिक्खभाल यकीनी बनाने पर बी जोर दिता।

<><><><><><>

Advisor -Film Industry

मुख्यमंत्री हुंदे सलाहकार नासिर असलम वाणी होरें मुम्बई च आयोजित FICCI Frames समारोह दे बाहरें कैई प्रमुख फिल्म निर्माताएं ते मनोरंजन जगत कन्नै जुड़े दे लोकें कन्नै मलाटी कीती। बैठक दौरान जम्मू-कश्मीर च फिल्में दी शूटिंग गितै सुविधाएं ते शानदार थाहरें ते साजगार माहौल बारे गल्लबात कीती गई। सलाहकार होरें फिल्म उद्योग दे लोकें गी आखेया

जे ओ जम्मू-कश्मीर औन ते आपू इत्थे फिल्में दी शूटिंग लेई उपलब्ध माहौल ते सुविधाएं गी दिक्खन। असलम वाणी होरें गी मिलने आहलें च केंई फिल्मी संगठन दे मिम्बर शामिल हे, जिन्दे च प्रोड्यूसर्स गिल्ड ऑफ इंडिया, राष्ट्री फिल्म विकास निगम, मोशन पिक्चर एसोसिएशन (अमरीका), प्रसार भारती ते इंडियन मोशन पिक्चर प्रोड्यूसर्स एसोसिएशन वगैरा शामिल न।

<><><><><><>

CS Waterways

मुख्य सचिव अटल डुल्लु होरें जम्मू-कश्मीर च ट्रांसपोर्ट खेतर च आधुनिकरण आहली मुख्य परियोजनाएं दे कम्मै च तेजी आहनने दे निर्देश दिते न। ट्रांसपोर्ट मैहकमे दे कम्मैकाजै दा आकलन करने लेई लाई गेदी इक उच्ची सतह दी बैठक दी प्रधानता करदे होई मुख्य सचिव होरें जम्मू च डरैवर ट्रेनिंग ते रिसर्च इंस्टीच्यूट दे कम्मै सने सांबा च निरीक्षण ते प्रमाणन केन्द्र दे कम्मै गी बी बेल्ले सिर सबूरा करने दी जरूरतै पर जोर पाया। उ'ने सिइक सुरक्षा हीलें दी सख्ती कन्नै पालमा जकीनी बनाने दी जरूरतै पर जोर पाया। बैठक दरान एह जानकारी दिती गई जे सरकार झेहलम दरेया पर जलमार्गे गी परतियै शुरू करने दी योजना बना करदी ऐ। इस मौके पर इब्बी दस्सेआ गेआ जे गड्डिएं गी कबाड़ बनाने सरबन्धी इक नमी नीति गी मुक्कदा रूप दिता जा करदा ऐ तांजे ट्रांसपोर्ट मतल्लक इक ठोस ढांचे गी बढ़ावा दिता जाई सकै।

<><><><><><>

Yatra Resumes

खराब मौसम बारे जारी चेतावनी गी ध्यानै च रखदे होई उपरोतली त्रंऊ दिने तोड़ी बंद रौहने दे बाद श्री माता वैष्णो देवी जी दी यात्रा अज्ज परतियै ब्हाल होई गई ऐ। मौसम विभाग नै 4 कोला 7 अक्टूबर तोड़ी त्रिकुटा दिये पहाड़िये समेत जम्मू प्रांतै दे मते सारे इलाकें च भारी बरखा ते उप्परले पहाड़ी इलाकें च बर्फबारी दी भविक्खवाणी कीती दी ही, जेहदे चलदे ल्हास-पस्सियां पौने दी शेंका बी जताई गई ही, जिसी ध्यानै च रखदे होई श्राईन बोर्ड नै यात्रा रोकने दा फैसला लैता हा। हून मौसम च सुधार ते सुरक्षा स्थिती दी जांच करने दे बाद यात्रा खोली दिती गई ऐ।

UGC NET

NTA नै UGC –NET दिसम्बर-2025 लेई पंजीकरण प्रक्रिया शुरू करी दिती ऐ। इच्छुक मेदवार अधिकारिक वेबसाईट उप्पर उपलब्ध लिंक राएं इस म्तेहान लेई आवेदन करी सकदे न। UGC दी अधिसूचना मुजब पंजीकरण प्रक्रिया 7 नवम्बर तगर खुली दी रौहग।

<><><><><><>